

Sclarir avon che lubir

La radunonza dalla vischnaunca burgheisa da Sagogn dil gliendisg vargau renviescha la damonda dalla vischnaunca da Laax da construir in reservuar sin intschess dils burgheis da Sagogn. La vischnaunca burgheisa vul ensemen cun la vischnaunca politica da Sagogn sclarir las damondas aviartas en connex cun il provediment d'aua cun la vischnaunca da Laax avon che conceder il dretg da baghegiar.

ANDREAS CADONAU/FMR

«Ord il ravugl dalla radunonza ei vegnida la proposta da sliar las divergenzas cun la vischnaunca da Laax avon che conceder la lubientscha da baghegiar.» Quei gi il president dalla vischnaunca burgheisa da Sagogn, *Flurin Panier*, e conceda che la radunonza dalla vischnaunca burgheisa dils 18 da mars 2024 hagi renviu ina dallas damondas

da baghegiar dalla vischnaunca da Laax. La radunonza dalla vischnaunca burgheisa da Sagogn ha numnadamein giu da tractar duas damondas ch'ei vegnidas giu da Laax. Inaga la damonda da remplazzar la lingia d'aua si Lavanuz ed allura la damonda per baghegiar in niev reservuar si Plaun Casti.

Il dus loghens nua che la vischnaunca da Laax vul investir el provediment d'aua sesanflan bein sin intschess territo-

rial da Laax, ein denton en possess dalla vischnaunca burgheisa da Sagogn. La damonda da remplazzar la lingia d'aua ha la vischnaunca burgheisa da Sagogn concediu il gliendisg vargau. Quella da baghegiar il reservuar sin Plaun Casti han ils burgheis da Sagogn denton renviu.

«Nus targein vid il medem sughet»
Damondas aviartas en connex cun il provediment dall'aua denter la vischnaunca

da Laax e la vischnaunca burgheisa da Sagogn dat ei differentas. Ellas han era gia fatschentau la dertgira federala, denton sin iniziativa dalla vischnaunca da Faleira. Las divergenzas ein gia pliras gadas vegnidas tematisadas dalla FMR. La davosa ga en ina contribuziun cumparida ella LQ ils 18-12-2023. Ina contribuziun che tematischa a fontauna dall'Alp La Fuorcla en possess dils burgheis da Sagogn che la vischnaunca da Laax ha ne-

zegiau diesch onns alla liunga senza indemnizar quels da Sagogn.

Dispitevlla ei era la damonda sin tgei intschess communal ch'ina dallas fontaunas sur il vitg da Sagogn sesanfla. Sco quei ch'il president dalla vischnaunca burgheisa sinceresch vulan ils burgheis da Sagogn buc impedir il reservuar dalla vischnaunca da Laax. «Sche las damondas aviartas ein sligidas vegnin nus puspei a sefatschentiar cun la damonda da baghegiar.» Il president dalla vischnaunca burgheisa da Sagogn fa attent che la decisiun dalla radunonza burgheisa seigi curdada en cunvegnientscha cun ils organs dalla vischnaunca politica da Sagogn. «Nus targein vid il medem sughet.»

Priu per enconuschientscha

Il president dalla vischnaunca da Laax, *Franz Gschwend* ha priu per enconuschientscha la decisiun dalla vischnaunca burgheisa da Sagogn. El deplorescha quella decisiun, desista denton da valetar ella. Che la decisiun dalla vischnaunca da Laax da renviar la damonda da fusiun da Laax, Sagogn e Schluen gioga ina certa rolla ellas ponderaziuns dils burgheis da Sagogn sa el s'imaginar. Clar ei che la decisiun dalla vischnaunca burgheisa da Sagogn retarda ils plans d'investiziun previ da Laax si Plaun Casti. «Nus havein aunc auters project sin rucca che nus vegnin a prender per mauns avon che baghegiar il reservuar.»

Sper las damondas dil dretg da baghegiar han ils varga 21 presents alla radunonza burgheisa era giu d'elegger la suprastonza. Sper ils suprastonts en uffeci ei era il president *Flurin Panier* vegnius elegius per ina proxima perioda d'uffeci.



Igl ual sur Cons/Laax ei en possess dalla vischnaunca burgheisa da Sagogn che conceda pil mument buc il dretg da baghegiar in reservuar en quei liug alla vischnaunca da Laax.

FOTO AUGUSTIN BEELI

Il cant dalla damaun tschessa

Il cant dils utschals promovi la ventireivladad, pretenda silmeins la Staziun ornitologica svizra da Sempach che festivescha ils 6 d'avrel 2024 siu 100avel onn d'existenza. Bia motivs da far fiasta datti denton buc, il cant primavaun dils utschals ei periclitau pir che mai, denter auter era pervia dils gats.

ANDREAS CADONAU/FMR

Il cant dils utschals la damaun ella leva da dil sulegl promova sentiments da primavera. E fa ventireivels, quei pretenda silmeins il pledader da medias dalla Staziun ornitologica svizra da Sempach, *Livio Rey* viers la Televisiun svizra SRF. El fa attent ad in studi che conferma quella ventireivladad. Auters fatgs meins legreivels ein medemamein cumprovai, numnadamein ch'il cant dils utschals sesminuescha cuntinuadamein. Buca forza perquei che l'utschleglia havess pirs il plascher da cantar. Tenor las indicaziuns dalla staziun ornitologica ein 40 % dils utschals che cuan periclitai e 20 % ferm periclitai.

Cuar el prau

«Tiels utschals ils pli ferm periclitai s'audan quels che cuan el prau», gi la survigiladra da catscha, *Pirmina Caminada*. E tier quels appartegnan la pernisch, la quacra ni fuffadutg, sco igl utschi vegn era numnaus, ed era la lodola. Las midadas ell'agricultura dils decennis vargai simplifichesch buca la veta als utschals che fan igniv el prau. «Demai ch'ils praus vegnan segai pli baul ed era pli stedi vegnan era ils cuvis destrui.» Leu nua che la survigiladra da catscha fa stem dad utschals che cuan el fein contactescha Primina Caminada dil pur per intimar el da spitgar cun segar entochen ch'ils utschals ein cuai ora e pon scappar dalla maschina da segar. «Tenor pur e prau funcziunescha quei detg bein», gi la survigiladra da catscha.

Ei dat differentes motivs ch'il diember d'utschals sereducescha. Tenor las

indicaziuns dalla Staziun ornitologica svizra da Sempach engrevegieschan buca sulet las midadas ell'agricultura la veta alla utschleglia. Las activitads dil temps liber sper flums e lags, leu nua ch'ils utschals tgiran lur descendenza, disturban medemamein. Las midadas climaticas ein era buca fetg d'engrau a differentas spezias. Sco per exempel al pasler alpin che viva sur 1500 meters e che pitescha perquei ch'il cunfin da neiv s'avonza pli e pli.

Bians gats fan catscha

En Svizra vivan buca meins che 1,8 milliuns gats, en media circa 50 entochen 60 gats per kilometer quadrat. Quellas indicaziuns vegnan dalla Uniu per il nutriment dils animals da casa. Els marcaus e loghens habitai ei la concentrasiun da gats aunc in bionton pli aulta, leu vivan varga 400 gats per kilometer quadrat. E quels 1,8 milliuns gats svizzers senutreschan per bia buca sulet da kitekat, whiskas ni miurs. Enconuschentamein van ils gats era bugen a catscha d'utschals. Gest la primavera, cu ils utschals giuvens banundan igl igniv, ein els ina leva preda pils gats.

L'organisaziun per la proteziun dalla natira Bird Life tematischa la catscha da gats sin l'utschleglia e menziuna studis en marcaus dalla Frontscha e Belgia che fan valer ch'ils gats maglien entochen 25 % dils utschals giuvens els parcs dils marcaus. E l'organisaziun dat era buns cussegls per engrevgiar als gats la catscha sin utschals, per exempel cun pender curularins e stgalins entuorn culiez. Per la survigiladra da catscha, *Pirmina Caminada*

«Demai ch'ils praus vegnan segai pli baul ed era pli stedi vegnan era ils cuvis destrui.»

Pirmina Caminada, survigiladra da catscha

ein ils gats in da plirs problems che levgieschan buca la veta alla utschleglia. Il problem cardinal ei tenor sia optica il fatg ch'il nutriment dalla utschleglia, ils insects, ein sereduci marcantamein. «Sch'ins vul mantener il cant dils utschals ston ins la finala porscher als insects il spazi da viver.»



La quacra vala per ina spezia ferm periclitada.

FOTO MAD

Uniu per proteger ils utschals

Proteger ils utschals ei era in tema en Surselva, nua che l'uniu Protecziun d'utschals Surselva ei setablida avon dus onns. L'uniu presidiada da *Helen Riedi* ha gest salvau sia raduonza generala l'entschatta mars. «Actualmein dumbrein nus varga 70 commembras e commembars.»

Sco quei che *Helen Riedi* tradescha organisescha l'uniu divers arranschaments che tematischan buca sulet ils utschals e lur spazi da viver. «Nus vulein era s'engaschar a favur dalla biodiversitad.» Il program dallas activitads previdas igl onn current ein accessiblas via la pagina dalla Protecziun d'utschals Surselva.